

KUGLAŠKI SAVEZ BOSNE I HERCEGOVINE
S A R A J E V O

DISCIPLINSKI PRAVILNIK

Sarajevo 25.04.2004.

Na osnovu člana 16. Statuta Kuglaškog saveza Bosne i Hercegovine, Skupština Kuglaškog saveza Bosne i Hercegovine na sjednici održanoj 25.04.2004. godine, donijela je:

DISCIPLINSKI PRAVILNIK

I. – OPŠTE ODREDBE

Član 1.

Disciplinski pravilnik Kuglaškog saveza Bosne i Hercegovine (u daljem tekstu: Pravilnik), propisuje mjere i postupak za kažnjavanje igrača, sudaca, trenera, rukovodilaca i klubova koji prekrše Statut i Pravilnike Kuglaškog saveza Bosne i Hercegovine (udaljem tekstu: KS BiH), ili na bilo koji drugi način štete ugledu kuglaškog sporta.

Član 2.

Nepoznavanje Statuta i Pravilnika navedenih u članu 1. ovog Pravilnika nikoga ne opravdava.

Član 3.

Posticanje i pomaganje kod izvršenih prekršaja se jednako kažnjava kao i izvršeni prekršaj, a može se i blaže kazniti.

Član 4.

Pokušaj se kažnjava samo kada je to ovim Pravilnikom predviđeno. U načelu pokušaj se kažnjava blaže nego izvršeni prekršaj.

Član 5.

Ako je izvršeno više prekršaja, utvrdit će se predhodno visina kazne za svaki prekršaj, a zatim izreći jedinstvena kazna, koja ne može biti veća od dvostruke visine najteže utvrđene kazne.

Član 6.

Ako se protiv izvršioca prekršaja vodi postupak pred više disciplinskih tijela, tada će se predmet ustupiti višem disciplinskom tijelu radi donošenja odluke o svim prekršajima.

Član 7.

Ako se za vrijeme izdržavanja kazne izvrši novi prekršaj, izreći će se najprije kazna za novi prekršaj, a potom jedinstvena kazna prema odredbama člana 5. ovog Pravilnika.

Član 8.

Kod utvrđivanja kazne uzimaju se u obzir sve okolnosti koje utiču da kazna bude blaža ili teža (olakšavajuće i otežavajuće okolnosti), a naročito težina izvršenog prekršaja i njegove posljedice, stupanj odgovornosti izvršioca, pobude zbog kojih je izvršen prekršaj, okolnosti pod kojima je izvršen prekršaj, ranije ponašanje izvršioca i njegovo držanje poslije izvršenog prekršaja.

Prekršaj izvršen na međunarodnom takmičenju u zemlji ili inostranstvu uvijek je otežavajuća okolnost.

Samo izuzetno, ako se utvrde posebne olakšavajuće okolnosti, može se umjesto kazne

predviđene za izvršeni prekršaj izreći kazna ispod propisane. Ako je prekršaj izvršio igrač kadet/kinja ili omladinac/ka može se također primjeniti odredba predhodnog stava ovog člana.

Član 9.

Postupak protiv izvršioca prekršaja ne može se pokrenuti, ako je prijava podnijeta poslije 30 dana po izvršenom prekršaju, osim ako je u pitanju prekršaj na međunarodnom takmičenju ili teži prekršaj u zemlji. Sve dok se postupak može pokrenuti protiv igrača ili rukovodioca, može se pokrenuti i postupak protiv kluba.

Postupak protiv izvršioca prekršaja može se pokrenuti u roku od 90 dana od dana saznanja za učinjeni prekršaj, s tim da postupak mogu pokrenuti sva nadležna tijela.

Član 10.

Niko ne može biti kažnjen prije nego bude saslušan.

Smatra se da je neko saslušan ako na poziv nadležnog tijela dostavi pismenu izjavu ili ako na sam zapisnik ili prijavu da izjavu.

Ako izvršilac prekršaja odbije doći na saslušanje, ili odbije dostaviti pismenu izjavu, smatra se da je saslušan.

Član 11.

Pod ovaj Pravilnik ne potpadaju prekršaji Tehničkog pravilnika koji se provode na licu mjesta.

Isključenje iz daljeg takmičenja povlači sa sobom automatsku suspenziju i disciplinski postupak.

Član 12.

Ako se u roku od 15 dana ne povede disciplinski postupak, prestaje automatska suspenzija i suspendovani ima pravo nastupa poslije proteka navedenog roka.

Kad nadležno tijelo povede disciplinski postupak može se i ranije ukinuti automatsku suspenziju i povesti redovan disciplinski postupak, s tim da, isključenje s takmičenja povlači kaznu zabrane nastupa ili vođenja ekipe i slično, od jedne utakmice.

Za najteže disciplinske prekršaje, automatska suspenzija se ne može ukinuti prije isteka 15 dana od dana učinjenog prekršaja ili od od dana saznanja za prekršaj.

Član 13.

Automatsku suspenziju izriču Tehnički i Disciplinski komesar (u daljem tekstu: Komesar), rukovodstvo ili predstavnici organizacija (klubova) ili tijela Saveza, svako iz svoje nadležnosti.

II. – DISCIPLINSKE MJERE

Član 14.

Disciplinske mjere su:

1. za igrače:
 - a) opomena,
 - b) zabrana nastupa za određeno vrijeme,

- c) zabrana nastupa na određenom broju prvenstvenih i kup utakmica,
 - d) zabrana nastupa u inostranstvu,
 - e) poslednja opomena pred isključenje,
 - f) isključenje iz kluba, i
 - g) doživotna diskvalifikacija.
2. za rukovodioce, trenere, sudce i ostale službene osobe:
- a) opomena,
 - b) novčana kazna,
 - c) zabrana vršenja funkcije na određeno vrijeme,
 - d) poslednja opomena pred isključenje,
 - e) isključenje iz kluba ili rukovodstva, i
 - f) doživotna diskvalifikacija.
3. za klubove:
- a) opomena,
 - b) novčana kazna,
 - c) zabrana nastupa u inozemstvu,
 - d) zabrana nastupa u sledećem domaćem takmičenju istog ranga,
 - e) oduzimanje plasmana,
 - f) oduzimanje bodova u liga takmičenju, i
 - g) isključenje iz članstva KS BiH.

Član 15.

Za lakše disciplinske prekršaje u načelu se izriču kazne opomene, a za lica iz tačke 2. člana 14. i klubove može i novčana kazna.

Član 16.

Za teže disciplinske prekršaje u načelu se izriču disciplinske kazne zabrane nastupa ili vršenja funkcije na određeno vrijeme, zabrana nastupa na određenom broju takmičenja – utakmica, zabrana nastupa u inostranstvu, poslednja opomena pred isključenje, novčana kazna kao i oduzimanje plasmana i bodova za klubove.

Član 17.

Za najteže disciplinske prekršaje izriču se disciplinske kazne isključenje iz kluba ili za rukovodstva doživotna diskvalifikacija kao i zabrana nastupa na sledećim takmičenjima istog ranga za klubove.

Za klubove najteža kazna može biti isključenje iz KS BiH.

Član 18.

Kazna zabrane nastupa i kazna zabrane vršenja funkcije u zemlji ne može biti duža od dvije godine.

Kazna zabrane vršenja funkcije povlači i zabranu nastupa i obratno.

Član 19.

Kazna zabrane nastupa igrača na određenom broju prvenstvenih utakmica (liga) ili KUP utakmica, nemože biti manje od 2 a veše od 6 nastupa.

Član 20.

Kazna zabrane nastupa na određeno vrijeme i kazna zabrane nastupa na broju prvenstvenih i KUP takmičenja odnosi se podjednako kako na ekipna, parovna tako i na

pojedinačna takmičenja.

Član 21.

Isključenje igrači ili rukovodioca iz kluba ili rukovodstva automatski povlači kaznu zabrane nastupa od 6 mjeseci, koja se ne može zamjeniti kaznom zabrane nastupa na određenom broju prvenstvenih i KUP utakmica.

Član 22.

Kazna zabrane nastupa u inostranstvu ne može biti duža od tri godine. Ova se vrsta kazne može izreći samo za prekršaje izvršene na takmičenju u inostranstvu ili na međunarodnim utakmicama u zemlji.

Ako je klub kažnjen zabranom nastupa u inostranstvu, njegovi članovi ne mogu gostovati u inostranstvu dok klubu ne neistekne kazna u bilo kojoj funkciji u kuglaškom sportu, osim u sastavu državne reprezentacije.

Član 23.

Kazna oduzimanje bodova može se izreći samo na takmičenju po liga sistemu, a najviše do 4 boda. U koliko klub do izricanja ove kazne nije osvojio dovoljan broj bodova da bi se kazna mogla izvršiti, ovi bodovi će se oduzeti od onih bodova koje klub osvoji do kraja takmičarske godine.

Kazna oduzimanje bodova u ligaškom takmičenju mora se izreći najkasnije prije završetka poslednjeg kola lige, izuzev ako je to kazna za prekršaj iz poslednjeg kola, koja se mora donijeti u roku od 8 (osam) dana po završetku poslednjeg kola.

Predsjedništvo Kuglaškog saveza BiH dužno je u drugostepenom postupku donijeti odluku u roku od 8 (osam) dana, nakon čega Sportska arbitraža u roku od 8 (osam) dana donosi konačnu odluku po ovakvom predmetu.

Član 24.

Kazna oduzimanje plasmana i bodova primjenjuje se na onu ekipu iz kluba koja je učinila prekršaj.

Član 25.

Visinu novčanih kazni zapojedine disciplinske mjere utvrđuje za tekuću godinu Predsjedništvo KS BiH. Visina novčane kazne za lica iz člana 14. tačka 2. ne može biti manja od 100 KM, niti veća od 500 KM. Visina novčane kazne za klubove ne može biti manja od 500 KM, ni veća od 2.000 KM.

Konačno utvrđena visina kazne mora se uplatiti u roku od 30 dana po pravosnažnosti odluke, na račun KS BiH.

Član 26.

Ovako prikupljena sredstva od novčanih kazni služit će za unapređenje omladinskog i reprezentativnog kuglanja, a po potrebi i za rad tijela u KS BiH.

Član 27.

Odluke o kaznama koje izrekne klub djeluju samo u okviru toga kluba osim kada su u pitanju kazne za najteže disciplinske prekršaje.

Ova će kazna imati djelovanje u okviru cijele kuglaške organizacije, ako je na prijedlog kluba potvrdi Komesar, koji može i umanjiti kaznu koju je izrekao klub. Prijedlog se mora

podnijeti u roku od 15 dana po pravosnažnosti odluke uz predočenje cjelokupnog dokaznog materijala.

Član 28.

Za sve prekršaje koje izvrše rukovodioci kao predstavnici svojih klubova, odgovornost mogu snositi i sami klubovi.

Član 29.

Pravosnažne odluke o kazni upisuju se u registar kazni koji vodi Komesar. Pravosnažne odluke o kazni koje mogu imati uticaj na regularnost takmičenja dostavljaju se svim zainteresovanim klubovima i Tehničkom komesaru.

III. – PREKRŠAJI

Član 30.

Kao lakši disciplinski prekršaji u načelu se smatraju nesportska ponašanja i nepridržavanja akata kluba koji ne izazivaju veću štrtu, niti imaju veću društveno-sportsku opasnost.

Svaki klub ili nadležno tijelo može svojim posebnim aktom utvrditi mjere kažnjavanja za prekršaje, koje moraju biti u skladu sa ovim Pravilnikom.

Član 31.

Kao teži disciplinski prekršaj u načelu se smatraju izrazito nesportska ponašanja igrača, nepravilna nastupnja ili ne dolazak na takmičenje, fizički napad sa lakšim posledicama, neizvršavanje obaveza, nepridržavanje Tehničkog pravilnika KS BiH, neplaćanje članarine i novčanih kazni i slično. Svaki klub ili nadležno tijelo može svojim posebnim aktom utvrditi mjere zaprekršaje, koje moraju biti u skladu sa ovim Pravilnikom.

Član 32.

Kao najteži disciplinski prekršaji u načelu se smatraju krivotvorenje službenih dokumenata i odluka, nepridržavanje Statuta, Pravilnika o registraciji i ostalih akata KS BiH s težim posledicama, učinjena krivična djela u sportu i izvan njega, ispoljavanje nacionalizma i drugih štetnih društvenih pojava, fizički napad sa težim posledicama i nanošenje težih tjelesnih povreda, ponovljeni teži prekršaji i slično.

Svaki klub ili nadležno tijelo može svojim posebnim aktom utvrditi mjere kažnjavanja za prekršaje, koje moraju biti u skladu sa ovim Pravilnikom.

Ne provođenje obaveza i odluka KS BiH i NBC za klubove se smatra nejtežim disciplinskim prekršajem.

Član 33.

Nagovaranje igrača da ne igra po svom najboljem znanju i mogućnostima, pružanje i obećanje poklona ili druge materijalne pogodnosti igraču ili klubu da jednu ili više utakmica igra tako da time koristi drugom klubu ili prihvaćanje takve ponude od strane igrača ili kluba kažnjava se zabranom nastupa ili vršenja funkcije od šest mjeseci do dvije godine, a u ponovljenom ili težem slučaju doživotnom diskvalifikacijom.

Klub koji izvrši ovaj prekršaj kažnjava se novčanom kaznom, a u ponovljenom ili težem slučaju oduzimanjem bodova ili zabranom nastupa na sledećem takmičenju.

Za pokušaj će se kazniti.

Član 34.

Nagovaranje igrača da ne počne ili da napusti takmičenje kažnjava se zabranom nastupa ili vršenja funkcije od tri do šest mjeseci.

Za pokušaj će se kazniti.

Igrač koji ne počne ili napusti takmičenje kažnjava se zabranom nastupa od tri do šest mjeseci.

Ako tako postupi cijela ekipa ili toliko broj igrača da ekipa ne može početi ili nastaviti takmičenje, klub se kažnjava novčanom kaznom, a oni igrači koji nisu htjeli početi ili su napustili takmičenje kaznom zabrane nastupa od šest mjeseci do godinu dana.

Član 35.

Igrač koji nastupi na prvenstvenoj utakmici za klub koji nije registrovan ili još nije stekao pravo nastupa ili ako nema liječnički pregled ili mu je liječnik zabranio takmičenje ili se nalazi pod suspenzijom, ili kaznom, kaznit će se zabranom nastupa od dva do šest mjeseci, a odgovorni rukovodilac ekipe kaznit će se zabranom vršenja funkcije od tri do osam mjeseci.

Član 36.

Neopravdani izostanak ekipe ili pojedinca na prvenstvenoj ili Kup utakmici za koju su se prijavili ili ne dolazak delegiranih sudaca na suđenje je prekršaj za koji se klub kažnjava novčanom kaznom, a igrač i sudac zabranom nastupa odnosno vršenja funkcije od jednog do tri mjeseca.

Neopravdani izostanak ekipe sa prvenstvene utakmice Lige povlači za sobom kaznu oduzimanja 2 (dva) boda. U ponovljenom prekršaju ekipa se isključuje iz daljeg takmičenja.

Neopravdani izostanak ekipe sa drugih takmičenja povlači za sobom novčanu kaznu utvrđenu u članu 25. ovog Pravilnika.

Član 37.

Sva davanja i primanja materijalne prirode koja nisu predviđena propisima nadležnih tijela su prekršaj za koji se igračima i rukovodiocima izriču kazne zabrane nastupa ili vršenja funkcije od jedne do dvije godine, u težem ili ponovljenom slučaju doživotna diskvalifikacija, a klubu oduzimanje bodova ili zabrane nastupa na sledećem takmičenju istog ranga.

Za pokušaj će se kazniti.

Član 38.

Fizički napad na svog ili protivničkog igrača za vrijeme takmičenja ili prije odnosno poslije takmičenja, a vezi sa takmičenjem, kažnjava se zabranom nastupa od šest mjeseci do godinu dana, a u slučaju nanošenja teže tjelesne povrede od šest mjeseci do dvije godine ili doživotnom diskvalifikacijom.

Za pokušaj će se kazniti.

Član 39.

Fizički napad na sudca, delegata ili drugog rukovodioca na takmičenju ili proje odnosno

poslije takmičenja, a u vezi sa takmičenjem kažnjava se zabranom nastupa od šest mjeseci do dvije godine, a u slučaju nanošenja teže povrede doživotnom diskvalifikacijom.

Za pokušaj će se kazniti.

Član 40.

Fizički napad na tehničku osobu na automatima ili gledaoca kažnjava se zabranom nastupa od dva do deset mjeseci, a u slučaju nanošenja teže povrede od šest mjeseci do dvije godine ili doživotnom diskvalifikacijom.

Za pokušaj će se kazniti.

Član 41.

Fizički napad rukovodioca kluba na bilo koju osobu navedenu u članu 38. do 40. ovog Pravilnika, kao i fizički napad na sudca, delegata ili drugog rukovodioca na takmičenju, na igrača ili na bilo koju drugu osobu navedenu u članovima 39. i 40. ovog Pravilnika, kako za vrijeme takmičenja tako i prije odnosno poslije takmičenja, a u vezi sa takmičenjem, kažnjava se zabranom vršenja funkcije od šest mjeseci do dvije godine, a u slučaju nanošenja teže povrede doživotnom diskvalifikacijom.

Za pokušaj će se kazniti.

Član 42.

Izvršavanje fizičkog napada kažnjava se blažom kaznom, ako nisu nastupile teže posljedice.

Član 43.

Ako gledaoci svojim ponašanjem namjerno ometaju igrače u bacanju, ili ako prije, za vrijeme ili poslije takmičenja dođe do nereda, a klub organizator nije poduzeo potrebne mjere da se ova pojava spriječi, klub se kažnjava novčanom kaznom.

Član 44.

Nesportsko ponašanje, ukoliko je kažnjeno isključenjem sa takmičenja, kažnjava se zabranom nastupa od najmanje 2 (dvije) utakmice, odnosno zabranom nastupa ili vršenja funkcije od jednog do tri mjeseca.

Pod nesportskim ponašanjem se podrazumjeva psovanje, nepristojni pokreti, prigovaranje odluci ili ne izvršavanje odluke sudca, delegata ili drugog rukovodioca na takmičenju, kao i gledaoca, riječima i pokretima, kao i svako drugo ponašanje koje može škoditi ugledu kuglaškog sporta.

Član 45.

Vrijeđanje, klevetanje i širenje neistinitih glasina o svom ili drugom klubu, o svom ili protivničkom igraču, o bilo kom kuglaškom rukovodiocu ili sudcu ili kuglaškom tijelu, je prekršaj za koji se igraču, sudcu ili rukovodiocu izriče kazna zabrane nastupa odnosno vršenja funkcije od jednog do šest mjeseci, a u težem ili ponovljenom slučaju od šest mjeseci do godinu dana, a klub novčanom kaznom.

Član 46.

Ne podnošenje ili kasno podnošenje izvještaja s takmičenja, ne plaćane troškova sudcu

ili delegatu, kao i drugih troškova predviđenih u propozicijama takmičenja, ne podnošenje sudcu ili delegatu članskih knjižica (registracija) igrača i drugih isprava kada je to obavezno po tehničkim pravilnicima ili po propozicijama takmičenja, ne plaćanje članarine i druge takse za klub ili igrača, ne prijavljivanje ili kasno prijavljivanje takmičenja, otežavanje rada kuglaških tijela, ne dostavljanjem ili kasnim dostavljanjem odgovora, podataka, izvještaja i slično, kao i ne izvršavanje i svake druge dužnosti koje proizilaze iz propisa kuglaških tijela, jeste prekršaj za koji se rukovodiocima i sudcima izriče kazna zabrane vršenja funkcije od jednog do šest mjeseci, a klubovima naovčana kazna.

Član 47.

Podnošenje netačnih podataka u izvještaju ili prijavi ili unošenje netačnih ili lažnih podataka u prijavi za registraciju, ili istovremeno podnošenje prijave za registraciju za dva kluba, jeste prekršaj za koji se igrač ili rukovodilac kažnjava zabranom nastupa odnosno vršenja funkcije od jednog do šest mjeseci, a klub novčanom kaznom.

Član 48.

Rukovodilac ili sudac koji namjerno netačno primjenjuju propise tehničkih pravilnika, kažnjava se zabranom vršenja funkcije od dva mjeseca do godinu dana.

Član 49.

Svako ponašanje koje nije izričito predviđeno kao prekršaj u ovom Pravilniku, a predstavlja povredu Statuta i Pravilnika KS BiH i drugih propisa kuglaških organizacija i tijela, ili prelazi okvire uobičajene i dopuštene društvene i sportske djelatnosti, kažnjava se jednom od kazni koja je predviđena za sličan prekršaj.

III. – DISCIPLINSKI POSTUPAK.

Član 50.

Kazne izriču nadležna disciplinska tijela kuglaškog saveza i kluba.

član 51.

Disciplinski Komesar nadležnog Saveza rješava u prvom stepenu o svim prekršajima koje su izvršili igrači, rukovodioci, sudci i klubovi na svim takmičenjima za državna prvenstva, kao i članovi svih državnih reprezentacija.

Za prekršaje koje izvrše članovi Skupštine, Predsjedništvo, Nadzorni odbor KS BiH i druga tijela Predsjedništva, Predsjedništvo KS BiH formira posebnu disciplinsku komisiju.

Protiv odluke Komesara može se podnijeti žalba nadležnom kuglaškom tijelu do sportske arbitraže, čija je odluka konačna.

Član 52.

Disciplinska komisija kluba izriče kazne članovima kluba za prekršaje izvršene prema klubu.

Disciplinska komisija kluba može izreći kaznu zabrane nastupa i kaznu zabrane vršenja funkcije najviše do godinu dana.

Kazne koje izrekne disciplinska komisija kluba važe samo u okviru kluba, izuzev u slučajevima navedenih u članu 27. ovog Pravilnika.

Pritiv odluke disciplinske komisije kluba može se podnijeti žalba Predsjedništvu kluba, kao i nadležnom kuglaškom Savezu.

Član 53.

Odluka Predsjedništva kluba je konačna, izuzev za najteže disciplinske prekršaje za koje su izrečene najteže disciplinske mjere.

Na odluku Predsjedništva za najteže prekršaje može se uložiti prigovor za zaštitu zakonitosti, Skupštini kluba, s tim da se odluke Predsjedništva moraju provesti.

Član 54.

Prekršaje igrača, rukovodilaca, sudaca i klubova na međunarodnim susretima, zavisno od značaja takmičenja, rješava u prvom stepenu Komesar, izuzev slučaja koje rješava Predsjedništvo KS BiH po odredbama člana 51. ovog Pravilnika pa do sportske arbitraže.

Član 55.

Disciplinski postupak može se pokrenuti:

- a) na osnovu izvještaja delegata, glavnog sudca, sudca na stazi ili drugih rukovodilaca na takmičenju,
- b) na osnovu prijave kuglaškog rukovodstva ili rukovodioca,
- c) na osnovu prijave kluba ili člana kluba,
- d) na osnovu zajedničke prijave najmanje pet gledalaca na takmičenju, i
- e) po službenoj dužnosti.

Član 56.

Prijave se podnose nadležnom disciplinskom Komesaru koji odlučuje o pokretanju postupka.

Ako disciplinsko tijelo kome je podnijeta prijava nije nadležno riješavati, ustupit će prijavu nadležnom disciplinskom tijelu.

Član 57.

Postupak se mora pokrenuti kada je izvršen jedan od prekršaja koji je predviđen u ovom Pravilniku ili kada je igrač isključen, a to isključenje povlači automatsku suspenziju.

Disciplinski postupak se mora pokrenuti u roku od 15 dana po prijemu izvještaja ili prijave i o tome se mora obavijestiti izvršilac prekršaja.

Član 58.

Disciplinski postupak je hitan.

Prvostepeni disciplinski postupak mora biti završen u roku od 15 dana računajući od dana podnošenja izvještaja ili prijave.

U koliko u tom roku disciplinski postupak ne bude završen, smatra se da je postupak obustavljen, a podnosilac izvještaja ili prijave ima pravo žalbe drugostepenom tijelu.

Član 59.

U disciplinskom postupku saslušavaju se izvršilac prekršaja i svjedoci, a prikupljaju se i drugi dokazi.

Ako se disciplinski postupak vodi protiv kluba, mora se saslušati predsjednik ili druga ovlaštena osoba iz kluba.

Član 60.

Izvršilac prekršaja ima pravo tražiti da se o svom trošku pozove na sjednicu disciplinskog tijela kada se odlučuje o njegovom prekršaju.

Član 61.

Kada disciplinsko tijelo utvrdi da nema mjesta pokretanju ili daljem vođenju disciplinskog postupka, donosi odluku o obustavi postupka i o tome pismeno obavještava podnosioca izvještaja ili prijave.

Protiv odluke o obustavi postupka podnosilac izvještaja ili prijave ima pravo žalbe drugostepenom disciplinskom tijelu po odredbama Pravilnika.

Član 62.

Troškove disciplinskog postupka, ako ih ima, snosi izvršilac prekršaja protiv koga se izrekne kazna.

U slučaju obustave postupka ili oslobađanja od disciplinske odgovornosti, troškove postupka snosi rukovodstvo čije je disciplinsko tijelo vodilo postupak. Disciplinsko tijelo u svojoj odluci mora riješiti tko je dužan snositi troškove postupka.

IV. – SUSPENZIJA

Član 63.

Suspenzija može biti:

- a) automatska,
- b) na osnovu odluke disciplinskog tijela.

Član 64.

Automatska suspenzija nastaje kada je igrač isključen na javnom takmičenju.

Automatska suspenzija može trajati prema odredbama člana 12. ovog Pravilnika. Za naj teže disciplinske prekršaje, automatsku suspenziju Komesar može produžiti za još 60 dana.

Disciplinsko tijelo može donijeti odluku o skidanju automatske suspenzije, ako utvrdi da joj nema mjesta s obzirom na prirodu izvršenog prekršaja.

Automatska suspenzija se uračunava u kaznu.

Član 65.

Suspenzija na osnovu odluke disciplinskog tijela može se izreći:

- a) u slučaju kada je izvršen teži prekršaj, a suspenzija traje do donošenja odluke,
- b) u slučaju ne dolaska na saslušanje, suspenzija prestaje kada pozvani dođe na saslušanje,
- c) u slučaju ako se igrač, rukovodilac ili sudac nalazi u pritvoru, suspenzija traje do ukidanja pritvora.

Vrijeme provedeno pod suspenzijom se uračunava u kaznu, osim ako je u pitanju suspenzija zbog ne dolaska na saslušanje.

Član 66.

Ako izvršilac prekršaja koji je suspendovan ni poslije drugog poziva ne dođe na saslušanje, a od drugog poziva je prošlo 8 dana, izreći će se kazna na osnovu materijala kojim raspolaže disciplinsko tijelo.

Član 67.

Ako klub u ostavljenom roku ne uplati novčanu kaznu ili ne ispuni neku drugu obavezu prema drugom klubu ili rukovodstvu, bit će suspendovan na temelju odluke disciplinskog tijela.

Suspenzija počinje teći od dana isteka ostavljenog roka za isplatu novčane kazne ili ne ispunjene obaveze, a automatski prestaje u času uplate punog iznosa novčane kazne ili ispunjenja druge obaveze.

Član 68.

U odluci disciplinskog tijela mora se navesti: opis prekršaja, vrsta prekršaja, dan od kada teče kazna, obrazloženje i uputa o pravnom lijeku.

Član 69.

Disciplinsko tijelo je dužno odluku o kazni pismeno dostaviti izvršiocu prekršaja u roku os 3 dana, a u složenijem slučaju, u roku od 8 dana od dana izricanja.

Kazna ne može početi teći prije dostavljanja odluke, u koliko ne postoji suspenzija koja se uračunava u kaznu.

Član 70.

Protiv odluke o kazni može se podnijeti žalba u roku od 8 dana od dana uručenja odluke.

Uz žalbu se prilaže potvrda o uplati takse od strane žalioca, u visini koju odredi prvostepeno tijelo, s tim da taksa ne može biti veća od minimalno predviđene novčane kazne za klubove ili 25% od ove kazne za pojedince. Ako se žalba uvaži, uplaćena taksa se vraća žaliocu.

Žalba se podnosi prvostepenom disciplinskom tijelu, koje cijeli predmet u roku od 3 dana dostavlja višem disciplinskom tijelu, pošto predhodno utvrdi da li je žalba blagovremena i propisno taksirana.

Žalba koja nije podnijeta u propisanom roku ili koja nije uopće taksirana ili nije dovoljno taksirana, prvostepeno disciplinsko tijelo će ju odbaciti kao ne blagovremenu odnosno ne dozvoljenu.

Žalba nije dozvoljena protiv odluke o suspenziji.

Član 71.

Žalbu mogu podnijeti:

- a) kažnjeni,
- b) podnosilac izvještaja ili prijave,
- c) klub čiji je igrač kažnjen,
- d) rukovodstvo čiji je igrač kažnjen.

Podnosilac prijave ili izvještaja ne plaća taksu žalbu.

Član 72.

Žalba na odluku o kazni za naj teže disciplinske prekršaje ne odlaže izvršenje kazne.

Član 73.

Drugostepeno disciplinsko tijelo može rješavajući o žalbi odlučiti da se pobijedna odluka:

- a) ukine i predmet vrati prvostepenom disciplinskom tijelu na ponovni postupak,
- b) potvrdi,
- c) preinači i izrečena kazna poveća ili smanji, odnosno izvršilac prekršaja oslobodi odgovornosti.

Kazna se ne može povećati ako je samo kažnjeni podnio žalbu.

Drugostepeno disciplinsko tijelo (Predsjedništvo) mora svoju odluku donijeti na prvoj sjednici.

Ako drugostepeno disciplinsko tijelo ne donese svoju odluku u roku iz predhodnog stava, ili u roku utvrđenom u svom rješenju, smatra se da žalba nije usvojena.

Član 74.

Disciplinski postupak se može obnoviti:

- a) ako se utvrdi da je pravosnažna odluka zasnovana na lažnim dokazima,
- b) ako se sazna za nove činjenice ili nove dokaze na osnovu kojih bi mogla biti donijeta povoljnija odluka da su te činjenice ili dokazi bili upotrebljeni u ranijem postupku.

Član 75.

Prijedlog za obnovu postupka mogu podnijeti sve osobe i tijela iz člana 71. ovog Pravilnika, osim podnosioca izvještaja ili prijave, u roku od godinu dana od uručivanja pravosnažne presude.

U istom roku disciplinsko tijelo koje je izreklo kaznu u prvom stepenu može obnoviti postupak po službenoj dužnosti ako postoje uslovi iz člana 74. ovog Pravilnika.

Prijedlog za obnovu postupka ne odlaže izvršenje kazne.

Član 76.

Prijedlog za obnovu postupka podnosi se disciplinskom tijelu koje je izreklo kaznu u prvom stepenu.

Ako to disciplonsko tijelo utvrdi da je prijedlog za obnovu postupka osnovan, sprovest će novi postupak i donijeti novu odluku, koja za kažnjenog ne može biti nepovoljnija od ranije odluke.

Protiv odluke po prijedlogu za obnovu postupka podnosilac prijedloga ima pravo žalbe drugostepenom organu u roku od 8 dana od dana uručenja odluke.

Uz žalbu se prilaže potvrda o uplati takse koju utvrdi nadležno tijelo, s tim da taksa ne može biti veća od utvrđene u članu 70. ovog Pravilnika.

Član 77.

Kada je očigledno da je izrečena kazna imala puno odgojno djelovanje na kažnjenog, a

pošto je izdržana najmanje polovina kazne, može se podnijeti molba za izvanredno ublažavanje kazne.

Molba se podnosi disciplinskom tijelu koje je izreklo kaznu u prvom stepenu, a koje cijeli predmet sa svojim prijedlogom dostavlja na rješavanje nadležnom kuglaškom organu.

Nadležna Predsjedništva ako utvrde da je molba osnovana, mogu donijeti odluku o ublažavanju ili oslobađanju od daljeg izdržavanja kazne.

Protiv odluke po molbi za izvanredno ublažavanje kazne nema mjesta žalbi. Molbu za izvanredno ublažavanje kazne može podnijeti kažnjeni ili klub odnosno rukovodstvo čiji je on član.

Molba za izvanredno ublažavanje kazne može se podnijeti samo jedanput.

Član 78.

Molba za izvanredno ublažavanje kazne doživotne diskvalifikacije može se podnijeti kada protekne najmanje dvije godine od dana pravosnažnosti odluke o kazni.

O takvoj molbi odlučuje Skupština one organizacije čije je disciplinsko tijelo donijelo odluku u prvom stepenu.

Molba se podnosi disciplinskom tijelu koje je izreklo kaznu doživotne diskvalifikacije, koje je sa svojim prijedlogom upućuje Skupštini.

Molba se može ponoviti po proteku dvije godine od dana odbijanja ranije molbe.

V. – ZAVRŠNE ODREDBE

Član 79.

Izmjene i dopune ovog Pravilnika vrše se po postupku koji važi i za njegovo donošenje.

Član 80.

Sva tumačenja i primjenu ovog Pravilnika u prvostepenom postupku daje Komesar, a u drugostepenom, Predsjedništvo KS BiH.

Član 81.

Svi niži oblici kuglaškog organizovanja dužni su svoje Pravilnike uskladiti sa ovim Pravilnikom u roku od 60 (šezdeset) dana.

Član 82.

Ovaj Pravilnik prihvaćen je na Skupštini KS BiH održanoj 25.04.2004. godine, i stupa na snagu 8 (osam) dana po usvajanju.

P r e d s j e d n i k
Skupštine KS BiH